

Mahasiswa beri penghargaan kepada kakitangan universiti

Oleh: Siti Khairiyah Binti Che Noruddin

TANJUNG MALIM – Mahasiswa Universiti Pendidikan Sultan Idris (UPSI) mengadakan majlis penghargaan jasa buat kakitangan universiti yang julung kalinya diadakan serta dirasmikan secara atas talian bagi mengelakkan penularan wabak Covid-19, November lalu.

Program itu berlangsung selama lapan hari, dari 18 hingga 25 November dan melibatkan 49 buah pusat tanggungjawab UPSI. Program ini merupakan satu inisiatif dari Majlis Perwakilan Pelajar (MPP) bagi menghargai jasa kakitangan UPSI.



Sesi penyerahan bingkai gambar (frame) kepada kakitangan universiti.

MPP UPSI, Ruqayyah Osman, selaku exco ekonomi dan keusahawanan berkata, program yang julung kalinya diadakan itu adalah sebagai tanda penghargaan kepada kakitangan UPSI yang telah menjaga dan mengurus keperluan pelajar semasa penularan wabak Covid-19, seperti menyediakan makanan dan menghantar pulang pelajar yang terkandas di kolej kediaman ke kampung halaman masing-masing sewaktu tempoh kawalan pergerakan (PKP) dijalankan Mei lalu.

“Melalui sambutan yang diberikan, kami berharap program ini dapat diadakan pada setiap tahun,” katanya.

Turut serta pada majlis tersebut adalah Naib Canselor UPSI, iaitu Profesor Datuk Dr Mohammad Shatar Sabran. Seramai 25 orang MPP yang telah terlibat sama dalam majlis itu

turut mengagihkan cenderamata berupa bingkai gambar (frame) kepada semua kakitangan UPSI.

Pengarah program, CJ Lim berkata, bagi menyambut baik perintah kerajaan agar tidak mengadakan sebarang program, kami membuat keputusan untuk pergi ke setiap pusat tanggungjawab UPSI bagi mengagihkan cenderamata sebagai tanda penghargaan kepada mereka tanpa mengadakan majlis yang melibatkan kumpulan yang ramai.

Bersempena dengan majlis tersebut, Setiausaha Bahagian Pengangkutan UPSI turut mengambil peluang untuk beramah mesra dengan MPP. Pada masa yang sama, beliau turut memberikan surat penghargaan di atas jasa baik MPP yang sudi bekerja keras bagi memastikan majlis ini berjalan dengan lancar.

Sementara itu, kakitangan UPSI turut mengucapkan ribuan terima kasih kepada barisan MPP di atas kesungguhan mereka untuk memastikan program itu berjalan dengan lancar dan mereka juga berharap agar program seperti itu dapat diteruskan pada masa akan datang.

